

## СИРДАРЁ: ЎЗАНИГА ҚАЙТАЁТГАН ҲАЁТ

“Сардоба” сув омбори дамбасининг ўприлиши айрим масалаларга оид тасаввур ва қарашларимизни ўзгартириб юборди, десак муболаға бўлмайди. Жумладан, инсон табиий ва техноген тусдаги офатлар қаршисида ҳамон ожизлигича қолмоқда. Худди шундай, зудлик билан зарурий чоралар кўрилса, хатарни сезиларли даражада камайтириш мумкинлигига амин бўлдик.

Аниқроқ айтадиган бўлсак, 1 май куни тонгда ички ишлар органлари ходимлари аҳолини ўз вақтида огоҳлантирмаганида, фуқароларни хавфсиз худудга кўчириш тизимли тартибда амалга оширилмаганида, қутқарув тадбирлари самарали ташкил этилмаганида офат оқибатлари сал бошқачароқ бўлиши ҳам мумкин эди. Шунингдек, халқимиз сув босишидан зарар кўрганларга кўмак кўрсатиш орқали яна бир бор ҳамжиҳатлигини, меҳр-оқибатини намоён этди.

Табиийки, ички ишлар органлари ходимлари саховат тадбирларида ҳам фаол қатнашмоқдалар. Чунончи, хатар худудидан кўчирилган 300 дан ортиқ сирдарёликлар жиззахлик ички ишлар органлари ходимлари уйдан кўним топишди. Қолаверса, айти вақтда республикамизнинг қарийб барча худудларидаги ички ишлар органларининг қатор соҳавий хизматлари вакиллари офатдан зарар кўрган аҳоли пунктларига хизматга жалб этилган.

Хусусан, ИПХ ходимлари сув омборининг бузилган қисмини тиклашда ҳамда қурилиш-таъмирлаш ишларида қатнашаётган юзлаб юк машиналарини кузатиб бориш орқали хавфсиз ҳаракатни таъминламоқдалар. Ҳуқуқбузарликлар профилактикаси, шунингдек, патруль-пост хизмати вакиллари Миллий гвардия ходимлари билан биргаликда зарар кўрган худудлардаги мол-мулкларни кўриқлаб, тарқаб кетган минглаб чорва молларини қидириб топиш, сақлаш ва эгаларига қайтариш чораларини кўришяпти. Бундан ташқари фуқароларнинг йўқолган ва яроқсиз ҳолга келиб қолган ҳужжатларини расмийлаштириш изчиллик билан амалга оширилаётир.

Фуқароларнинг уйларини тиклаш ва зарарларни қоплашга киришилиши баробарида соҳа вакиллари зиммасидаги масъулият янада ортиди. Жумладан, юзлаб қурувчилар ва ўнлаб махсус техникалар фаолият кўрсатаётган аҳоли пунктларида жамоат тартиби ва йўл ҳаракати хавфсизлигини таъминлаш зарурати кучайди.

— Жиззах вилояти ИИБ ППХ ва ЖТСБдан 15 нафар ходим Мирзаобод туманининг “Ҳақиқат” маҳалласига хизматга жалб қилинганмиз, — дейди сафдор Акмал Эшонқулов. — Туну кун автомобилларда ҳамда пиёда патруллик қилмоқдамиз. Худуд аҳолисининг мол-мулкани асраш, жамоат тартибини сақлаш билан бирга турар жойларни тиклаш учун келтирилган қурилиш маҳсулотларининг талон-тарож этилишига йўл қўймаслик чораларини кўраяпмиз. Шунингдек, маҳалла аҳолиси ва қурувчилар ўртасида коронавирус инфекцияси тарқалишининг олдини олиш бўйича тушунтириш

олиб борилаяпти. Келганимизга 20 кундан ошди, бу даврда конунбузарликлар кузатилгани йўқ.

Маълумот ўрнида айтиш керак, Мирзаобод туманининг “Ҳақиқат” маҳалласидаги тошқиндан зарар кўрган 102 та 3 ва 4 хонали ҳамда 10 та икки каватли 4 хонали уйларни таъмирлаш ишлари жиззахлик курувчилар томонидан амалга оширилаяпти. Мазкур мақсадда 500 дан ошиқ курувчи ҳамда қарийб 60 та махсус техникаларнинг фаолияти таъминланган.

— Бизнинг қурилиш ташкилотимиз томонидан 6 та хонадон таъмирланмоқда, — дейди “Мукаммал қурилиш савдо” масъулияти чекланган жамияти иш бошқарувчиси Ойбек Қахҳоров. — Ушбу турар жойлар тўлиқ таъмирдан чиқарилади. Томга тунука қопланади, эшик ва деразаларга замонавий алюминий профилли ромлар ўрнатилади, поллар янгиланади. Ҳовлилар бир хилда девор билан ўраб чиқилади, айвон ва омборхона каби қўшимча иншоотлар юзага келтирилади. Худди шундай, уйлар ичимлик суви, электр тармоқларига уланади. Қисқаси, аҳоли қулай шароитларга эга бўлади.

Жиззах вилоятидан реконструкцияга жалб қилинган 19 та қурилиш корхонаси жамоалари таъмирлашни 2 ойда якунлашни режалаштиришган. Худди шу мазмундаги ишлар Сардоба, Мирзаобод ва Оқолтин туманларининг офатдан зарар кўрган бошқа аҳоли пунктларида ҳам амалга оширилмоқда. Табиийки, бу ўзгаришлар ҳудудда яшовчиларнинг эртанги кунга ишончини мустаҳкамлаяпти.

— Сув босишидан азият чекканларнинг барчаси бирдек халқимизнинг эътиборини, ғамхўрлигини ҳис этди, — дейди Мирзаобод тумани, “Ҳақиқат” маҳалласи, Қаҳрамон кўчасида яшовчи 63 ёшли Синдор Шодмонқулов. — Озиқ-овқат, кийим-кечак ва бошқа керакли воситалар билан мунтазам таъминланаяпмиз. Бугун курувчилар, ички ишлар органлари ходимлари, ҳарбийлар бизга ёрдамга келишган. Очиғи, офатсиз ҳам маҳалламиздаги айрим турар жойлар таъмирталаб бўлиб қолганди. Қилинаётган ишларни кузатиб, уйларимиз кўркам ва ҳамма шароитларга эга бўлишини сезаяпмиз. Ҳар бир оилага телевизор, музлаткич, газ плитаси, кондиционер, чангютгич, кир ювиш машинаси ҳамда 40 миллион сўмдан пул берилди. Булар ҳаммаси учун халқимиздан, Президентимиздан миннатдормиз.

Отахон айтганича бор, Сардоба, Мирзаобод ва Оқолтин туманларининг қайси ҳудудида бўлмайлик ўнлаб техникалар, юзлаб курувчиларнинг ишлаётганига гувоҳ бўлдик. Электр нимстанциялари ишга туширилиб, ичимлик суви қувурлари янгиланмоқда, кўприклар тикланаётир. Ўнлаб катта-кичик ишлаб чиқариш корхоналарига асос солинди, савдо ва маиший хизмат кўрсатиш шохобчалари бунёд қилинаяпти. Шунингдек, минглаб гектар пахта ва ғалла майдонларини сув билан таъминлаш мақсадида каналлар, ирригация тармоқлари тозаланмоқда.

Хуллас, Сардоба, Мирзаобод ва Оқолтинда ҳаёт яна ўзанига қайтмоқда. Ички ишлар органлари ходимлари эса жамоат хавфсизлигини таъминлаш ва

қонунбузарликларнинг олдини олиш орқали Сирдарёда кечаётган ўзгаришларнинг фидойи иштирокчиларига айланишган.

**Алижон АБДУСАТТОРОВ,**  
**“POSTDA” мухбири.**  
**Жиззах вилояти.**